

四庫全書

子部

欽定四庫全書

子部

唐開元占經卷一百二十九

詳校官中書_臣李采

靈臺郎_臣倪廷梅覆勘

總校官編修_臣王煦緒

校對官中書_臣王慶長

謄錄監生_臣龔際美

欽定四庫全書

唐開元占經卷一百十九

羊犬豕占

唐

瞿曇悉達撰

羊休徵

玉羊見

瑞應圖曰鐘律調五音當節則玉羊見師曠時

羊疫 夷羊 羊兩口 羊六頭 羊多角

漢書五行志曰視之不明是謂不哲時則有羊禍多疫

死及為恠

國語曰商之亡也夷羊在牧

賈逵注曰

夷羊神

獸也

貨食傳曰

羊揚也

許慎注淮南子曰大羊也牧商牧

野

天鏡曰羊一頭兩口其年不熟民飢亡

災異圖

曰王侯二千石不祇上命剋暴百姓吁嗟則一羊六頭

異苑曰石虎建武初秦州南安虞大柳摩獻六角及

四角羊各十山羗中有三角五角羊又旄牛有一角皆

其類也江陵黃丘村有羊兩頭一頭下不能鳴

羊四耳 羊無足 羊生犬馬

河圖曰黑羊四耳目在腋下名孽見即有起王 天鏡

曰羊無後足前吉後凶 又曰羊無前足先憂後悅

晉中興徵祥說曰咸和元年司徒府羊產無後足其後
蘇峻作逆 天鏡曰羊生犬國被外賊又曰羊生馬天
下將兵起

犬咎徵

犬狂疾

洪範五行傳曰犬禍者西方也以口守言之類也言氣

毀則犬傷疾矣故曰犬傷禍也旱歲犬多狂死或言氣
亂則犬為怪以期占之京房曰佞臣在側則犬妖生
歲多蝗蟲任佞則羣物盡傷犬妖則軍兵將至又曰
犬能言吉凶如其言又曰犬呼其主主且亡天鏡
曰犬作人音聲世主移

犬羣噪 犬自食子 犬反哺 犬負子

犬不嚙鼠

淮南子曰夏桀在位亂四時之政而萬物失所犬羣噪

起淵 運斗樞曰七政亂主見禁則天下犬吠 天鏡

曰犬吠街巷中不出其年有賊在邑 犬羣吠街巷中
不出其年外內戒嚴君臣交兵從朝廷起二犬吠衆犬
和兵必起 犬羣吠城池不出三年三月國內虛空

犬吠屋上國有喪 犬吠門巷中其邑不寧 京房曰

犬晨夜吠堂室上家且有喪邑亦然 天鏡曰犬羣吠暮

吠室中男若女必喜朝吠室中長女死 墨子曰三苗

大亂天命傾覆則犬吠於市中 天鏡曰犬逆吠其主

必遠行若國君遠征傷將亦傷兵 京房易傳云犬羣
蹕國將亡 天鏡曰犬自食子國無盜賊 又曰犬子
初生反哺其母國有義 又曰犬負其子走來入城池
中其國不征伐隣國歸犬負其子入巷民去其鄉 京
房曰犬無故皆見鼠不動邑且有賊臣公不禁下

犬聚宮門 犬浴水中 犬從地中出

京氏曰犬死無故當邑門及宮門聚如尸皆大凶 又
曰犬無故相從浴水中兵大作 又曰犬自地中出邑

大水君且貧 晉書徵祥說曰興平二年吳郡府舍地

中得犬子二頭一雄一雌太守張懋聞齋內牀下犬子

聲地自拆見有二犬取而養之皆成尋而懋為洗克所

害

注云夏鼎志曰掘地而得狗名曰假 尸子曰地中

有犬名地狼也 又曰晉孝武帝大元中廬江灊縣何

旭家忽聞地中有犬子聲即於聲處掘之見一狗母狀

甚羸瘦走入菰中不知所在視其處有犬子二頭一雄

一雌取而養之雌死雄活及長為犬善噬野獸其後旭

里中為蠻所沒 安帝隆安中輔國將軍孫無終家既陽中地中聞犬子聲尋穴地有折犬子皆白色一雄一雌取而養之皆死後無終為桓玄所誅

犬戴冠

京房曰君不正臣欲篡厥妖狗冠出朝門 漢書五行志曰昌邑王賀為王時見白犬冠方出冠而無尾此服妖示犬禍龔遂曰天戒在君也賀既廢死不得置後犬無尾徵也 續漢書五行志曰熹平中省內冠狗帶綬

以為娛樂有一狗突出走入司徒府門或見之者莫不驚怪靈帝寵用便嬖西園賣官實狗而冠也

犬生角 犬兩首 犬入宮室淫連 犬豕交

天鏡曰犬生角世主增地 京房曰犬生角必人主失政小人進用 漢書五行志曰文帝後元五年齊城門外有狗生角齊悼惠王亡後帝分齊地立其庶子七人皆為王兄弟並強有亢陽心故犬禍見犬守衛角兵家

在前向上也犬不當生角猶諸侯不當舉兵向京師也
運斗樞曰狗兩首人行銜刀宋均注云狗為人吠守
而設兩頭且主行銜刀兵是宿衛之臣欲判自作主而
妖也 地鏡曰犬入室中淫連君亡之象 呂氏春秋
曰亂國之妖犬彘乃連注云案漢書五行志曰景帝三
年邯鄲狗與彘交悖亂之氣近犬豕禍也比時趙王遂
悖亂與吳楚謀為逆遣使白奴求助卒伏誅 京房曰
人君夫婦不嚴厥妖狗與豕交茲謂反德國有兵革

犬生子異形

京氏曰犬生子三耳以上邑且有亂臣 犬子生一目
邑有臣事二主者 犬生子三目以上邑有大臣謀主
犬生子有二口邑有憂 犬生子鼻一孔邑有兵
犬生子有二鼻邑且有兵 犬生子三足以上其邑主
有公侯 犬生子有五足以上其邑且大卒行 犬生
子有二陰君多子 犬生子有二尾以上邑有徙亡

犬生子口在背邑有反臣 犬生子口在陰邑臣強主

命弱令不行 犬生子口在四足臣殺其君 犬生子
口在腹下及腹旁邑大憂 犬生子口在腹民大飢
犬生子口在四支其邑君亡 犬生子有鼻在四支邑
有兵 犬生子足在腹邑有徙亡 犬生子足在背邑
有大咎 犬生子足在首邑君且有大仇 犬生子尾
在腹邑有大臣殺君 犬生子尾在背四支邑有三主
爭者 犬生子無尾邑大臣殺君 犬生子無目邑主
病 犬生子無口鼻民飢 犬生子無足穀不成 犬

生子無尾邑民貧

犬生人

京氏曰犬生人其邑君失位兵行 犬生子人形不具
其邑有兵 犬生子人之形而物各不居其所者主亡
犬生人之形而六畜身主亡大有咎 犬生人之形
而飛鳥身邑大水 犬生人之形而野獸身此有亡主
犬生人之形而魚身者邑大水 犬生人之形而鼠
形者其邑虛

犬生六畜 犬生鼠生魚 犬生野獸 犬

生飛鳥蜂蛇

京氏曰犬生六畜其邑易命有大事 犬生六畜一首

二身邑有廢 犬生六畜兩身邑且二君流 犬生六

畜兩口以上邑大臣亂 犬生六畜三鼻其邑有亂臣

犬生六畜有人形者邑易主 犬生六畜無首其邑

有大事 犬生六畜無耳邑不用事 犬生六畜無目

其邑兵行 犬生六畜無口鼻民流亡作兵 犬生六

畜無四支邑不治有兵 犬生六畜無陰主且暴死
犬生豕歲大熟民樂 天鏡曰狗生豕吉不出三年國
安樂 京氏曰犬生子為鼠歲虛民流亡 犬生子為
魚邑有大水 地鏡曰犬生野獸大夫有外謀不出三
年君且亡國 京氏曰犬生野獸邑有大咎 犬生野
獸人形者邑有大兵 京房曰犬生飛鳥雖有人形及
不具皆為大兵及大水 犬生子為蜂天下更令 犬
生子為蜂虵其邑民人流

犬矢溺宮室道路 犬矢金石雜物

京氏曰犬矢宮室中殿堂上三日以上邑空虛 犬矢
王門中其主有喜 犬矢王門外邑主有憂 犬矢邑
社不及大神五日以上邑亡 犬皆羣溺於邑門外及
內兵作人家亦然 犬無故大道矢而行邑大凶 羣
犬無故皆矢大道中兵行 犬矢人民牀席上其殃大
犬矢井中家虛邑亦然 犬無故溺人其人不出三
歲亡 又曰犬矢石其邑臣強君弱 犬矢金鐵邑兵

大作 犬矢土邑愈墜

墜地也

犬矢五穀邑昌歲成

犬矢布帛邑有暴政 犬矢草木邑人有喪

豕咎徵

豕能言 豕自食子 豕自食尾

京氏曰豕能言吉凶如其言 豕晝同時俱鳴此謂哭
主歲不成 又曰豕自食其子家破 又曰豕反自食
其尾家富歲且凶

豕登屋入宮

京氏曰豕之屋上其邑得賢士 豕入君室中其社稷
邑君且亡 漢書五行志曰昭帝元鳳元年燕王宮永
巷中豕出圜壞都竈銜脯六七枚置殿前劉向以為竈
者生養之本豕陳脯於庭竈將不用宮室廢矣燕王不
改卒伏誅 地鏡曰野猪入宮室中其軍將圍小人失
宅 京氏曰豕無故入君室屋且有女憂為亂 又曰
赤彘見於國不出三年必有大禍野人為政

豕生子異形

災異圖曰王侯刺史二千石令長不祇上命則豕一頭
兩身六脚 古今注曰哀帝大初三年長安彘生兩頭
三目一目在項中 京氏曰豕生子有角其邑有福祿
豕生子有二口以上其邑且安 豕生子鼻一穴郡
有九侯 豕生子三足其歲不熟 豕生子五足以上
其邑有大咎兵 豕生子一陰其邑分無後 豕生子
目在四支其邑兵行得地 豕生子目在腹下及旁邑
有大咎 豕生子口在背邑主弱羣臣奪王令不行

豕生子口在腹其邑饑 豕生子口在四肢民饑兵作
邑亡 豕生子口在陰邑有大謀 豕生子耳鼻在腹
及背臣謀其主 豕生子耳鼻在四肢及在首上兵作
邑中 豕生子足在首上亡社稷 豕生子足在其腹
邑有大事 豕生子足在背其民勞於兵 豕生子尾
在腹及首邑有大事 豕生子無口其邑亂 豕生子
無目其邑臣奪主令 豕生子無尾其邑兵弱 豕生
子無尾有羽邑亡

豕生人

京氏曰豕生人之形即純行聖人且行兵不純行其邑失社稷 豕生人而有六畜形者此邑亂亡 豕生人形而有飛鳥者其邑大水 豕生人形而有野獸形者其邑兵 豕生人形如物各有不居其位邑失地

豕生六畜

京氏曰豕生六畜其邑易主 呂氏春秋曰亂國之妖有豕生狗 天鏡曰豕生狗不出三年國王走於野中

死 京氏曰豕生犬其君走謀於野中 豕犬形不具
邑有兵諸兵數起 豕生六畜有人形邑且更令 豕
生六畜一首二身邑分 豕生六畜二鼻以上邑有兵
行 豕生六畜二口以上其邑亡地臣亂 豕生六畜
三鼻三目以上其邑大恐 豕生六畜無首其邑不安
豕生六畜無目邑令不行 豕生六畜無耳其邑君且
不聽政 豕生六畜無口鼻其邑民流亡 豕生六畜
無陰其邑無嗣子 豕生六畜無四肢其君不治

豕生野獸蟲魚飛鳥蜂虵

運斗樞曰人主以不孝仁之名侵犯大道則豕生鹿

大道

者君政也

京氏曰豕生野獸其邑民饑有兵 豕生飛鳥

其邑水

豕生魚其邑大水災

豕生蟲蠅其邑流亡

豕矢金石草木

京氏曰豕矢金鐵邑兵大作

豕矢土邑增土

豕矢

石邑大兵強勝四方也

豕矢五穀歲成熟

豕矢草

木其邑有喪

唐開元占經卷一百十九

欽定四庫全書

唐開元占經卷一百二十

龍魚蟲蛇占

唐瞿曇悉達撰

龍龜魚蟲瑞

龍

瑞應圖曰王者承天命而天道四通而悉達無益之術
藏而世無浮言言吉則河出龍圖 援神契曰天子孝
則大龍負圖也 禮記曰聖王用水火金木必時頒爵

位必當年得無水旱之灾妖孽之疾則龍在宮治 天
鏡曰凡龍春見無殃咎 瑞應圖曰青龍水之精也乘
雲而上下不處淵泉王者有仁則出 又曰君子在位
不有斥退則見 禮稽命徵曰王者得禮之制則山澤
谷之中有赤龍 瑞應圖曰黃龍者五龍之長也不混
池魚德及淵泉則黃龍應和氣而遊池沼 蔡氏月令
章句曰智聽政事則黃龍見 瑞應圖曰王者精察賢
德則白龍見 河圖曰黃龍負鱗甲成字以授黃帝帝

令侍臣寫之以示天下

注

魏文帝雜事曰黃帝錄圖五

龍舞河北應聖賢之符也

尚書中侯曰河出龍圖赤

文像字以授軒轅

元命包曰唐帝遊河渚赤龍負圖

以出圖赤色如錦牀赤玉為匣白玉為檢黃珠為泥玄

玉為鑑章曰天皇大帝合神制署天上帝孫伊堯龍潤

涓圖在唐典右尉舜等百二十臣發視之藏之大麓

運斗樞曰舜為天子東巡至乎中月臨觀

注云

臨河觀望

月或為丹字也五采負圖出置舜前圖黃為匣如櫃長

三尺廣八寸厚一寸四分而連有石白玉為檢黃金為匣黃芝為泥封兩端章曰天皇帝符璽五字廣長各三寸深四分鳥文舜與三公大司空禹等三十人發視玄色而緋狀可卷舒長四十二尺廣九尺中有七十二帝地形之制天文分度之差注云黃帝含樞紐之使也故龍匣皆黃四合者有道相入也有戶言可開闔也尚書

中候云舜沉璧黃龍負卷舒圖出水壇畔赤文綠字也大戴禮曰顓頊端拱以有謀疏通以知事養財以任

地履時以象天依鬼神以制義治氣以教民潔誠以祭祀乘龍而至四海動靜之物大小之神日月所照莫不祇屬 又曰帝營妙日月而送迎之明鬼神而教事之春夏乘龍秋冬乘馬 括地圖曰禹平天下二龍降之禹御龍行城既周而還注神虛記曰禹乘二龍郭裏而為御 尚書中候曰周公攝命七年歸政成王沉璧於河榮光幕河青雲浮至青龍御玄甲臨壇吐圖而去注云周公攝政歸美成王制禮作樂天下治和榮光五色從

河水出幕覆其上浮雲從榮光中來青龍者蒼帝靈威仰之使也玄甲所以裏圖也

蛟

山海經曰禱過之山虎蛟魚身蛇尾音駕注云似蛇四

脚龍之屬也說文曰魚滿千頭蛟來為之長率魚而

飛置寄韭水即蛟去淮南子曰蛟龍寢于淵而卵乳

於陵注云許慎曰蛟鱉屬乳謂卵自乳者也文子曰王有

道德者天與之地助之鬼神輔之則蛟龍宿其治注云山

海經言蛟龍蛇而四脚小頭細頸頸有白嬰大者十數圍也

玉龜 龜負圖 玄龜負書

瑞應圖曰玉龜者為聖國出師曠時至以錄誠書 禮稽命徵曰制禮作樂改損祭器有鬼神之助則龜負圖又曰刑殺當其罪賞錫其功立事得禮之宜則龜負象戴 白虎通曰德至淵泉雒出龜書 禮含文嘉曰伏羲德洽上下故地應以龜書伏羲乃象以作卦 尚

書中侯曰黃帝東巡至洛龜書咸赤文綠字以授軒轅

注云虛龜負書所出黃帝咸則也 尚書中侯曰唐帝沉

璧於洛水龜負書出背甲赤文成字止壇也 又曰湯

沉璧於河黑龜出赤文題 又曰周公沉璧玄龜青純

注云何休解純綠也謂綠純千歲龜也含光刻背甲書止

洛於壇赤文似字周公視周王乃視龜留不去周公援

筆以世文而寫之書成文消龜去 宋書符瑞志曰玄

龜洛書者天符也王者德至淵泉則出

虛龜五色 龜在宮治

瑞應圖曰虛龜者玄文五色神虛之精也上隆法天下平象地能見存亡明於吉凶不偏不黨唯義是從其惟龜乎書龜從此謂也虛者德之精也龜者久也能明於久遠事王者不偏不黨尊者老不失舊故則神龜出又曰虛龜似鱉而長合五行之精三百歲遊於藕葉之上千歲遊於蒲上進一尺二寸王者奉順后土承天則見宋書符瑞志曰王者德澤湛清畋獵順時則出五色

鮮明龜三百歲遊於蓮葉上三千歲常遊於卷耳之上
禹卑宮室虛龜見 春秋禮演圖曰文命將興龜穴蓮
禮記曰聖王用民必順頌爵當時無水旱之災妖孽
之疫則龜在宮池

毛龜四眼六眼八眼龜

宋書符瑞志曰宋文帝三獲白龜孝武帝獲毛龜明帝
獲四眼龜六眼龜八眼龜前書不載當時並以為嘉
祥今附於龜瑞之末并戴戴當作戴其形以示將來也

比目魚 黃魚躍出 白魚入舟 神魚儼

河

瑞應曰王者明照出遠則比目魚見

注云爾雅曰狀如牛

脾細鮮紫色兩片相合乃行 尚書中候曰湯沉璧於

洛水黃魚雙躍出濟千澶玄鳥隨魚出示止化為玄玉

赤勒曰玄精太乙受神命伐天下服

注云

黃土色明土歸

湯玄鳥叶光紀之使天乙湯名天命之伐桀也 尚書

中候曰周武王渡於孟津中流白魚躍入於王舟王俯

取魚魚長三尺赤文有字題目下頰右曰姬發遵昌王
燔以告天有火自天流為赤烏注云孟津南河津名也古

助天告以伐紂之意姬周姓遵循也昌文王名言武王
之業也宋均注元命包曰燔魚祭天烟火光化為赤烏
烏日中陽物有光明而能照也漢書曰宣帝詔云朕飭
躬齋精所為百姓未濟大河天氣清淨神魚儼河朕之
德懼不能任

赤虵 大螭 大螭

禮稽命徵曰王者得禮之制則澤谷必有赤虵 東觀
漢記云安帝生赤虵盤於妝席之間 呂氏春秋曰黃
帝時天見大螾黃帝曰氣勝故其色尚黃其事則王注
曰螾蚯蚓也 帝王世紀曰黃帝得螾如虹應劭云神
螾大五六圍長十餘丈也 呂氏春秋曰黃帝時天見
大螾黃帝曰土氣勝故其色尚黃其事則王

野蠶成蠶

後漢書曰光武建武元年六月己未即皇帝位大赦天

下野蠶生麻尤盛野蠶成蠶被於山阜民獲其利非一
吳志曰孫權黃龍三年夏有野蠶蠶大如卵由卷野
稻自生改為禾興縣

龍龜魚蟲恠

無雲而龍出 黃龍墜 龍五色

天鏡曰大兵將至大水為害則無雲龍出 春秋合誠
圖曰黃帝將亡則黃龍墜 握鏡曰君失木行則春青
龍見國被兵其鄉散亡青狼豕亦然失火行則夏赤失

金則秋白失水則冬黑失土則四季黃皆如上占 又
曰蒼龍見國有凶黃龍見國有喪白龍見有兵黑龍見
有憂凶

龍見邑社廷廟

京房曰山見龍過於邑邑遷 赤龍見於國不出三年
必有大禍野人為政 天鏡曰龍見於社稷必有大戰
流血 龍從宮中出讒人聚其國亡 地鏡曰龍下朝
廷人君不順四時行出不時 龍以冬出當道或闕邑

中或乳國中或見上腹下背有大戰主憂

春夏秋出不占

墨子

曰昔三苗大亂天命殛之龍生於太廟 異苑曰會稽

有獨姥常織蘆布為業以義熙初晒績於庭忽疾風雷

雨山陰縣東魏家堂屋上有一蒼龍長數丈須臾而散

成績從風飄亂姥先以大瓮著階下有頃天雨蘆績滿

瓮視之悉是蘆績爾日郭中有曝晒者莫不失之後有

蘆龍之難尋自散走咸謂是其應矣

龍見井中

潜潭巴曰龍從井中出下為猾謀慮大兵不本而出

注云

龍從井出聖人在下位今而見勢稍大欲猾亂時主祥也 京房曰井出龍若馬君不守宗廟 又曰有德遭

害厥妖龍見井中

又曰君行暴惡黑龍從井中出

漢書五行志曰惠帝二年正月癸酉旦有兩龍見於蘭陵延東里溫陵井中至乙亥夜去劉向以為龍貴象而困於庶人井中象諸侯將有幽執之禍其后呂太后幽殺趙王諸呂亦終誅滅 魏志曰高貴鄉公正元元年

冬十月戊戌黃龍見於鄴井中甘露元年正月辛丑青龍見軹縣井中二年二月青龍見溫縣井中三年黃龍仍見頓丘冠軍陽夏縣界井中四年正月黃龍二見寧

陵縣界井中

注

漢晉春秋曰是非龍人乃咸以為吉祥

帝曰龍者君德也上不在天下不在地揜而數居於井非嘉兆也乃作潛龍詩以自諷焉司馬文王見而惡之五年五月己丑高貴鄉公卒時年二十又曰帝見威權日去不勝其忿遂帥僮僕數百摻鼓而出文王第十

七騎校尉伸入遇帝於東門左右訶之伸衆奔走中護
賈充入逆帝戰南闕下帝自用劍衆欲退太子舍人成
濟前刺帝刃出於背 陳留王景元元年十二月甲申
黃龍見華縣井中三年二月青龍見軹井咸熙二年十
一月壬戌詔羣公卿士奉皇帝璽綬策禪位於晉嗣王
晉陽秋曰太原五年龍見武庫井中帝觀有喜色百
官將賀劉毅以為不祥孫楚上事曰頃聞武庫井中有
二龍羣官或謂之禎祥而稱賀或有謂之非祥無所賀

可謂楚既失之而齊亦未為得也而龍守鱗翼潛於重淵或仰攀雲漢遊於蒼昊而今蟠於坎井同雄於蛙蝦豈獨管庫之士或有隱伏期役之賢沒於行伍故龍見光景有所感悟耶 異苑曰謝晦家室各宅南路上有古井以元嘉二年汲者忽見二龍甚分明行道住觀者莫不嗟異有人入井看乃是磚隱起龍形衆從邊出澆灌殊駛後晦等皆伏法淮南所謂井見而貴臣拘者也

龍逐人

洪範五行傳曰秦文公大獵有龍出逐文公公射得之
龍逐人非所當也射而得之非所當射得也射為射妖
龍為龍孽皆脅亂之君所致也龍者天之象陽之表超
乎衆也射兵革之禍也龍傷獲為擒滅之患是國且有
兵將擒獲也文公感悟改行自新因居汧之陰子孫繁
昌

龍鬪 龍死

考異郵曰龍鬪則主將易宋均曰龍君象鬪則將爭也

潛潭已曰日月食之則蛟龍羣鬪 京房曰龍鬪邑

中厯數日不止人主且分比兵為憂 漢書五行志曰

左傳昭公十九年龍鬪於鄭時門之外洧淵劉向以為

近龍孽也鄭小國攝乎晉楚之間重以強吳鄭當其衝

不純修德將鬪三國以自危亡是時子產任政內惠於

民外善辭令以交三國鄭卒亡患此純以德消變之効

也

案春秋經即鄭定公也

續漢書五行志曰桓帝延熹元年河

內野王山有死龍長可數十丈衰楷以為龍者帝王瑞

天鳳中黃山宮有死龍漢兵誅王莽此易代之徵後魏
代漢

靈龜執 龜無文 穿井得龜

合誠圖曰玄帝將亡則靈龜執 堯錄書曰玄帝之將
終也水不流下則龜無文 世語曰晉長沙王從封長
沙至國穿井入地四丈得大石其中有靈龜而長二尺
餘長沙王誅之象也 車頻奏書曰符堅建元十三年
高陸縣民穿井得龜其大三尺六寸背文負八卦古字

堅藏之太卜因而養之十六年而堅死今取其骨稽問
吉凶名曰客龜太卜佐齊魯夢客龜言我歸江南不過
死於秦魯自解曰龜三萬六千歲而終之必有災國之
徵

巨魚見 丹魚見

京房曰海數見巨魚邪人進賢者疏 漢書五行志曰
靈帝熹平二年東萊海出大魚二長八九丈高二丈餘
明年中山王暢任城王博並薨 異苑曰勃勃虜都

長安端門外甃水有聲視水如沸有丹魚長三尺有赤
光國尋滅

河魚逆上及生人 魚偃行

京房曰衆逆同志厥妖河魚逆上 洪範五行傳曰秦
始皇八年河魚逆水上劉向以為魚孽魚陰類民象也
逆水上民將不從君令為逆行也 京房易候曰下無
臣大人不實則魚生人 運斗樞曰天下將亂則魚偃
無足行宋均曰魚潛伏今見且偃行是弱而降自恣無

所畏也

魚飛 魚見屋上

京氏曰魚飛者治國無禮義則魚飛水有淵奧即魚居焉國無禮義民去焉故魚飛不救有虛邑其救也安民治業定禮興樂 又曰魚入師中司馬將戰勝魚飛集於司馬鼓上司馬當之 地鏡曰魚飛入路中兵作又曰魚飛去水國有暴兵 漢書五行傳曰聽之不聽是謂不謀君嚴寒氣動故有魚孽魚去水而飛極陰之孽

也 京房易傳曰青魚去水飛入道兵將起 握鏡曰
魚忽出屋上死道中皆有兵奔敗 魏志曰齊王正始
中有二魚長尺集於武庫之屋有司以為吉祥王肅曰
魚生於淵而居於屋介鱗之物失其所也邊將其殆有
乘甲之變而後果有東闕之敗

五色蛇 蛇有翼足

淮南萬畢術曰君失春政則倉蛇見於邑即歲多禍君
失夏政則赤蛇見君失秋政則白蛇見君失冬政則黑

蛇見 京房曰玄蛇冬出則君凶 河圖曰蛇四足四

翼各羣立見則兵作 合誠圖曰白帝將亡則蛇有足

伏如人 京氏易傳曰青蛇見足軍中將罷

蛇入都邑宮廟

禮記曰威儀曰賤人為君則蛇入都 潜潭巴曰朝有

大蛇親屬無道將何為宋均注曰蛇陰物而性黷燕今

而在朝是親屬或欲為無道何為言不成也 吕氏春

秋曰妖孽生國有遊蛇蛇一西一東 漢書五行志曰

皇之不極是謂失德則有蛇孽 灾異圖曰外鎮王侯
不祇上命尅暴百姓則龍蛇見 京氏曰蛇羣聚大道
上邑有急兵 蛇聚於國必有圍城黃蛇見於邑旱長
蛇見大水 淮南萬畢術曰君室無故見蛇君且去蛇
無故在牀上君非其子 漢書五行志曰左傳文公十
六年有蛇自泉宮出入於國如先君之數劉向以為泉
宮在圃中公母姜氏嘗居之地從之出象宮將不居也
又蛇入國將有女憂也如先君之數者公母將薨之

象公惡之乃毀泉臺後二年薨公子遂殺文公之二子惡視而主宣公文夫人歸於齊搜神記曰魯定公元年秋有九蛇繞柱占曰以為九世廟不祀乃立煬宮

會稽典錄曰淳于翼字叔通除洛陽市長桓帝即位有大蛇見德陽殿上翼占曰以蛇有鱗甲兵之應也晉

徵祥說曰大寧中武昌有大蛇居神寺神樹上出頭從

人受食

案京房易
妖占曰

大蛇見神寺不出三年有大兵國有

大憂時王敦作逆晉惠帝起居注曰齊有大蛇長三

百餘步又負二蛇長十餘步過市市人悉逐觀之繇齊
城北門入漢景祠須臾不復見京房易傳曰蛇見將
軍營中師罷出則中軍將軍得志或曰得士

蛇鳴君室 蛇交市廷 蛇衝腹 蛇鬪

淮南萬畢術曰為死事則蛇鳴君室京房曰蛇鳴君
室凶地鏡曰蛇交於市及廷中者不出三年必有亡

主各以其國君應之運斗樞曰君失政臣挾私期

期字

當作蛇衝巴

巴腹
蟲也

河圖曰大蛇朝市路羣鬪又去不

去霸者當路 淮南萬畢術曰蛇無故鬪於君室後必
爭立小死小不勝大死大不勝小大皆死皆不立也

漢書五行志曰左傳鄭厲公時有內蛇與外蛇鬪鄭南門中
內蛇死劉向以為先是鄭厲公刼相祭仲而逐昭公代
立後厲公奔出公復入弟子儀代立厲公自外刼大夫
傅瑕使僂子儀此外蛇殺內蛇之象 趙書曰前趙時
安定太守邵琨上言蛇與鼠鬪於郡門而蛇自死

蛙聚 蛙與蝦蟆鬪

易辨終備曰蛙聚大盜出 運斗樞曰妃色惑主蛙累
入邦門 漢書武帝元鼎五年秋蛙與蝦蟆羣鬪是歲
四將軍衆十萬征南越

候蚯蚓出 蜈蚣入邑 蟻聚土 候螳螂

生 候蜩鳴

周書時訓曰立夏後五日蚯蚓出不出則臣奪后令冬
至之日蚯蚓結不結則君政不行 京房曰見山蛰蛆
入於邑內殺廣雅曰蜈蚣也 又曰蟻無故當道若門

戶城聚土水且傷人 易通卦驗曰螳螂搏蟬蟬之蟲
乘虛而殺物自隱蔽而有所害捕搏之象也奸人性陰
邪行令失節所生武官不務詰奸故為奸猾事發月令云
小暑至螳螂生周書曰夏至後五日蜩始鳴不鳴則貴
臣放逸立秋之日寒蜩不鳴 通卦驗曰遁上九候蟬
始鳴蟬不鳴人臣力爭國多妖言

螻蛄集朝廷 蚯蚓螻蛄見軍中 螻蛄大

如牛

京房易飛候曰螻蛄集朝廷厥咎黜 又曰蚯蚓螻蛄
見軍中尤多師將罷有謀者不久地生諸蟲將軍急去
大山 抱朴子曰螻蛄見軍尤生多有軍罷又宜備叛
京氏曰螻蛄大如牛長一丈見邑且有賤人貴

蜂食苗 蜂生國 蜂入軍中 蛾飛蔽日

五行傳曰秦昭王委事太后弟穰侯為丞相弟謙蕩君
皆用事私門權傾公朝三十八年上郡大饑山東盡死
民無所食蜂食民苗蜂食民苗者赤祥之災也能飛揚

之類亦挾毒火之色也不當食苗象不當位也故見災
以蜚之蜂見挾毒物之害也天意若曰君不明臣下若
蜂蠆而奪民將為國家害也天鏡曰蜂生國舍內空
亡象兵書曰軍行蜂羣飛蜂及蜜蜂尤多者必大戰
道路防之又曰軍中有蜂鳴移主將敗士卒亡矣

漢書元帝紀曰建昭元年春三月上幸雍祠五時秋八
月有白蛾飛蔽日從東都至軹道

注

如淳曰三輔黃圖

長安城東北次門號曰宣平城門其外郭曰東都門也

冬河間王元有罪廢遷房陵

蝗生

五行傳曰介蟲者小蟲有甲能蜚揚之類陽氣所生於
春秋為象蟲今謂之蝗皆其類也曰介蟲之孽也說文
曰蝗螽也旱氣動象至使乞貸則生滕舊說螟螽蟲
賊一種蟲也如言寇盜奸宄内外言之耳故捷為文學
曰此四種皆蝗也禮月令曰孟夏行春令則蝗蟲為
災春秋緯曰愁精所感擾氣所生螽冬生天不能滅

地不能藏 潛潭巴曰生蝗蟲兵大起行千里 五行
傳曰君行暴虐而賦稅貪叨無厭以師動衆取邑治城
而失衆心則蟲為害 爾雅曰蝗蟲食苗心曰螟食苗
葉曰蠶食苗根曰蝻食苗節曰賊 董仲舒對災異曰
佞臣居位貪叨之徵邪人在位則蝗蟲食葉君用臣才
不任職則蟲食莖君用佞人在朝則蟲食節君用奸賊
在位則蟲食根禮月令仲春行夏令蟲蝗為害說文曰
螟蟲食穀心從冥聲吏冥冥犯法即生螟 呂氏春秋

曰亂國之妖有螟集其國其年凶 淮南子曰政惡生

孽蟲食心 京房曰吏為貪狼多螟騰宮室奢蟲食葉

漢書五行志曰春秋魯哀公十二年十二月螟十三

年九月螟十二月螟劉向以為春用田賦冬而螟此三

螟皆虐取民之効 春秋漢含孽曰魯室履畝而稅貪

恣太過則蠋生 漢書五行志曰劉歆以為蠋蠅蠹之

有翼音此食穀為災黑青也董仲舒以為蠋螟始生也

是時初稅畝亂先王制故應是而蠋生詩推度覽曰在

下不臣蟲食葉貸者伐也小臣為政事變其法故立字
貸與伐同其變臣欲殺也京房曰得無節蟲食葉說

文曰野蟲食草根者也吏抵冒取民則生螭京房曰

臣安祿厥灾蟲食根不絀無德蟲食本害忠孝蟲食根
握鏡曰螟蟲食根咎在女主社稷毛詩義禮曰蟲

長而細或說云蟲螻蛄也螻蛄食苗根為人患詩推

度覽曰傷苗食之賊也京房曰與公侯爭蟲食螽傷

忠臣蟲食螽史記秦始皇四年十月螟蟲從東方來

蔽天如嚴雪是歲天下失苾瓠 漢書五行志曰景帝
中元三年秋蝗匈奴寇邊武帝元光五年秋蝗五將衆
三十萬伏馬邑又四將征匈奴元鼎五年秋蝗四將征
南越元封六年秋蝗兩將征朝鮮太初元年夏蝗從東
方飛至燉煌三年秋復蝗其年貳師征大宛天下奉其
役連年征和三年秋蝗四年夏蝗先是一年三將連衆
十餘萬征匈奴貳師七萬人沒不還平帝元始二年秋
蝗徧天下是時王莽秉政 漢書王莽地皇三年夏蝗

從東方來蔽天至長安入未央宮緣殿四年漢兵斬莽
續漢書五行志曰安帝永初四年夏蝗是時西羌寇
亂軍衆征距之連年五年夏九州蝗六年三月去年蝗
處復蝗子生七年二月郡國蝗順帝永建五年郡國十
二蝗是時鮮卑寇朔方用衆征之永和元年秋七月偃師
蝗去年年冬烏桓寇沙南用衆征之續漢書五行志
曰桓帝永興元年七月郡國三十二大蝗是時梁冀秉
政東觀漢記曰馬稜伯威為廣陵太守連年有蝗穀

貴陵奏罷強官薄賦稅蝗蟲飛入海中化為魚蝦 晉
中興徵祥說曰元帝大興二年徐州及揚州之西江郡
蝗三年冀州蝗皆胡肆暴之徵 武帝太元十六年五
月崇邑界有蝗廣千里長三十里許從南來其飛蔽天
害苗稼是時官以賄成皆入私庫貪私苟得之徵也
趙書曰石勒十四年五月飛蝗穿地而生二十日化如
蠶七八日而卧四日蛻則飛周遍河朔百草無遺唯不
食三豆及麻

蠅生蠅蔽

蛟虵興

蚤大如牛

蟻蠆滿

野

春秋漢舍孽曰妃黨縱橫佞人譖世則蠅生 春秋魯

莊公十八年秋有蠅注云蠅短狐也蓋以含沙射人為

災也 漢書五行志曰莊公十八年有蠅劉向以為蠅

生南越之地多姪婦人男女同川淫女為主亂氣所生

故宣武名之蠅

蠅由蠅也謂之短

是時莊公將取齊之淫女故

蠅至 五行傳曰詩云為鬼為蠅則不可得蓋氣精也

詩義禮曰一名射景如蠶三足紀年晉獻公二年春周
惠王居于鄭鄭人入王府多取王玉化為蜮射人 古
今注曰成帝建始元年六月蒼蠅萬數集白虎門朝坐
處蔽地 漢書昌邑王賀夢青蠅矢積西階東河五六
石以屋瓦覆發視之青蠅矢也以問龔遂遂曰階下左
側讒人衆多願皆放之賀不用其言卒至於廢 詩推
度災曰逆天地絕人倫則蚊蚋興 兵書曰軍行逢蚋
尤多者必大戰道路防之 異郵曰陳涉即亡景駒為

主項羽誅嬰都制九塞自稱楚王地生神蚩大如牛

淮南子衰世飛蛭滿野許慎曰蛭蟻蝶也

蟄蟲不藏 蟲兩足 飛蟲反墜 蟲生宗

廟


春秋繁露曰木干水冬蟄蟲不藏土干水蟄蟲冬出

潛潭巴曰蟲兩足赤口諸侯強 五經異義公羊說后

夫人之家專權擅勢秉持國政蠶食百姓則蟲飛反墜

握鏡曰甲蟲無故生宗廟中不出三年臣背叛兵興

國憂亡天下蟲無故自死用刑暴戾害過
京房曰軍
行道逢蟲蛇怒必大戰吏兵與馬賊將死以君大就五
校亂錯故致以恠



唐開元占經卷一百二十